

游部汇考

礼记

月令

仲夏之月可以远眺望可以升山陵

宋沈括忘怀录

游览物制

安车轮不欲高高则摇车身長六尺可以卧也其广合辙輶以蒲索缠之索如钱大可也车上设柱盖密簾为之纸糊黑漆勿加校恐太重又蔽眼害于观眺厢高尺四寸设茵粗之外可以饮马车后为门前设扶拔加于厢上在前可凭在后可倚临时移徙以铁跌子簪于两厢之板上可阔之余令可容书策及看樽之数厢下称以一版卧则障风近后为宰尺以备及卧临时以铁跌之簪于车盖梁及厢下无用则卷之立于车前车后为纳陛令可垂足而坐要卧则以版架之令平琴书酒榼扇帽之类驻车携盖间车后皆可也卧观山也车后施幪幪两头施轻如画轴大如指有雨则展之传于前柱欲障风日则半展或偏展一边

游山客不可多多则应接人事劳顿有妨静赏兼仆众所至扰人令为三人具诸应用共物为两扇二人荷之操几杖持盖杂使更三人足矣肩輿者不预客有所携则相照裁损无浪重复惟轻简为便器皿皆木漆轻而可负唯酒杯或可用瓮石左几且倚令人不倦仍可左右盘足或枕档角敲眠无不适便其座方二尺足高一尺八寸档高一尺五寸从地至档共高三尺三寸木制藤口或竹为之尺寸随人所便增减为口长七尺广三尺高一尺八寸自居以上别为子面嵌大口中间子面广二尺五寸长三尺皆木制靠坐欲涩欲眠令身不褪常下虚二寸口下以板称之勿令通风又子面嵌下与大口平一头施转轴中间子面底设一拐撑分五刻子面首挂一枕若欲危坐即撑起令子面直上便可靠背以枕承脑欲稍偃则退一刻尺五刻即与大口平矣凡饮酒不宜便卧

常倚□而坐稍倦则稍偃之困即放平而卧使一童移撑高下如意不须移身可以遂四体之适大□两椽有二尺前后凿三孔上为直孔二其下为笋欲倚手则嵌凡于窳孔中观雪□长九尺阔八寸高六尺以轻木为格纸糊之三面如枕屏风上以一格覆之面前施夹幔中间可容小坐□四具不妨设火及饮具随处移背风屏之迴地即就雪中卓之比之毡帐轻而开阔不碍瞻眺施之别用皆可不独观雪也汤铉温酒为檐以铜深三寸平底可贮一寸汤以酒杯排汤中酒温即取饮之冬时拥炉静坐免使童仆纷纷殊尽幽致

行具二有甲肩一左衣筐一衣被枕盥漱具手巾足布汤瓶梳镜右食具一行为之二隔平底盖为四食盘子三每盘果子揲下矮酒榼一可容数升以备注酒匏一杯三涑筒合子贮脯修干果嘉蔬各数品饼少许以备饮食不时以应仓卒唯三盘相重为一隔其余分任之暑月果修皆不须移一肩竹隔二下为柜上为虚隔左隔上层书箱一纸笔墨砚剪刀韵略杂书数卷柜中□櫟各六匙箸各四生果数品削果刀子右隔上层琴一竹匣贮之折迭棋局一中贮棋子茶二三品腊茶即煨熟者盞托各三杯盂瓢七等附带杂物小斧子斫刀斲药锄子蜡烛拄杖泥靴雨衣伞笠食铍虎子急须子油筒

敲□如今倚□也但两向施档齐高令曲而上平僧亦有偏禅倚亦有反档然高低不等难为敲倚若背倚左档可右档亦可凡臂倚左档可右档则不可药井道院中择好土地凿一井须至深而狭小勿令太大即费药江南浙东以至远方山间多紫白石英洞中多鍾乳孔公□投银钱三千使人腰之操几杖者可兼也令人采掇各一二石捣如豆粒杂投井中磁石亦好云母庐山尤多欲用之须拣成块者勿击碎皆完用之仍须先下云母乃以众石盖其上深数尺盖防云母屑入水中饮之有害故也每日汲水饮或供烹茶酿酒作羹饮皆用之久极益人唐李文饶

家药井仍用朱砂硫黄黄金珠玉如此尤好但山家不可致耳其井须极深深则容药多多则力盛而堪久仍以此井难即浚须要一凿便深乃可久用井上设楹常扃锁之恐虫鼠坠其间一或为庸人孺子所芸草古人藏书中谓之芸香是也采置书帙中即去蠹置席下即去蚤虱栽园庭间数十步极可爱叶类豌豆作小丛生秋间叶上微白如粉汗南人谓之七里香江南极多大率香草多只是花香过则已纵有叶香者须采掇嗅之方香此种十步外此间已香自春至秋不歇绝可玩也

洞天游录

笠

有细藤作笠方广二尺四寸以皂绢蒙之缀檐以遮风日名云笠有竹丝为之上以檲叶细密铺盖名叶笠有竹丝为之上缀鹤羽名羽笠三者最轻便甚有道气

杖

有方竹上生九节其崇不满七尺有棕竹合竹之别竹俱可作杖有三代时立鹄飞鹄杖头周身金银镶嵌用以饰杖上悬二三寸长小葫芦小灵芝及五岳图卷暮年携之探奇历怪多有相长之益若万岁藤藜藿为杖形虽奇怪此为老衲行具恐非山人家扶老也姑置勿取

渔竿

江上一蓑钓为乐事钓用纶竿竿用紫竹纶不欲大竿不宜长但丝长则可钓耳豫章有丛竹其节长而直为竿最佳长七八尺敲针作钩钓出沧浪月钓出千秋万古心是乐志也意不在鱼或于红蓼滩头或在青林古岸或值西风扑面或教飞雪打头于是披羽蓑顶羽笠执竿烟水俨在米芾寒江独钓图中比之严陵渭水不亦高哉

舟

形如□船底惟平长可三丈有余头阔五尺内容宾主六人僮仆四人中仓四柱结顶幔以篷簟更用布

幕走檐罩之两傍朱栏内以布绢作帐用蔽东西
日色无日则悬钩高卷中置桌凳列笔□香鼎盆玩
酒具花尊之属后仓以蓝布作一长幔两边走檐前
缚船尾钉两圈处以蔽僮仆风日用二面桨泛湖棹
溪更着茶起烟一缕恍若画图中一孤航也别置
小船如叶系于柳浪阴处时平闲暇执竿把钓放于
中流或于雪霁月明桃红柳媚之时放舟当溜吹紫
箫鼓铁笛以动天籁使孤鹤乘风唳空或扣舷而歌
饱风月回舟返棹归卧松逍遥一世之情何其
乐也

叶笺

取吴中罗纹长笺为之以蜡板研肖叶纹用剪裁成
红色者肖红叶绿色者象蕉叶黄色者肖贝叶山游
时偶得绝句书叶投空随风飞扬泛舟付之中流逐
水浮沉自多幽趣

葫芦

有天生一寸小葫芦用以缀为衣纽又可悬于念珠
有物外风致若用杖头挂带盛药二三寸葫芦亦妙
其长腰鹭鸶葫芦可悬药篮左畔右可为鹭瓢吸饮
小匳葫芦可为冠及瓢俱以生相周匝摹弄精神无
汗气方妙

瓢

有瘦瓢其形如芝如瓠者山人携以饮泉大不过四
五寸而小者半之惟以水磨其中布擦其外光彩如
漆明亮烛人虽水湿不变尘污不染庶入精鉴有小
匳葫芦可作瓢须摹弄莹洁方妙

药篮

即水火篮也有以二匳瓢为之有退红漆者上开一
盖放丹炉一个内实应验药膏药以便随处济人山
童携之有物外风致

衣匣

以皮护杉木为之高五六寸盖底不用板幔惟布里
皮面软而可举长阔如毡包式少长一二寸携于春
时内装绵夹便服以备风寒之变夏月装以夹衣秋

与春同冬则绵服暖帽围顶等件匣中更带搔背竹
钯并铁如意以便取用

迭桌

二张一张高一尺六寸长三尺二寸阔二尺四寸作
二面折脚活法展则成桌迭则成匣以便携带席地
用此口合以供酬酢其小几一张同上迭式高一尺
四寸长一尺二寸阔八寸以水磨楠木为之置之坐
外列炉焚香置瓶插花以供清赏

提盒

深夫所制高总一尺八寸长一尺二寸入深一尺式
如小厨为外体也下留空方四寸二分以板闸住作
一小仓内装酒杯六酒壶一筋子六劝杯二空作六
格如方盒底每格高一寸九分以四格每格装碟六
枚置果馐供酒觞又二格每格装四大碟置鲑菜供
饌筋外总一门装卸即可关锁远宜提甚轻便足以
供六宾之需

提炉

式如提盒亦深夫制高一尺八寸阔一尺长一尺二
寸作三撞下层一格如方匣内用铜造水火炉身如
匣方坐嵌匣内中分二孔左孔炷火置茶壶以供茶
右孔注汤置一桶子小镬有盖顿汤中煮酒长日午
余此镬可煮粥供客傍啗一小孔出灰进风其壶镬
迴出炉格上太露不雅外作如下格方匣一格但不
用底以罩之便壶镬不外见也一虚一实共二格上
加一格置底盖以装炭总三格成一架上可箒关与
提盒作一付也

备具匣

近制以轻木为之外加皮包厚漆如拜匣高七寸阔
八寸长一尺四寸中作一替上浅下深置小梳匣一
茶盞四骰盆一香炉一香盒一茶盒一匙筋瓶一上
替内小砚一墨一笔二小水注一水洗一图书小匣
一骨牌匣一骰子枚马盒一香炭饼盒一文具匣一
内藏裁刀锥子挖耳挑牙消息修指甲刀锉发刷等
件酒牌一诗韵牌一诗筒一内藏红叶各笺以录诗

下藏梳具匣者以便山宿外用关锁以启闭携之山游亦似甚备

酒尊

注酒远游古有□器甚佳铜提次之近以锡造者恶甚余意磁者负重铜者有腥不若蒲芦作具内用光漆挟之远游似甚轻便山游当与以上三物束以二架共作一肩彼此助我逸兴

游部艺文一

远游

周屈原

悲时俗之迫厄兮愿轻举而远游质菲薄而无因兮焉托乘而上浮遭沈浊而污秽兮独郁结其谁语夜耿耿而不寐兮魂营营而至曙惟天地之无穷兮哀人生之长勤往者余弗及兮来者吾不闻步徙倚而遥思兮怊惝恍而永怀意荒忽而流荡兮心愁淒而增悲神倏忽而不返兮形槁枯而独留内惟省以端操兮求正气之所由漠虚静以恬愉兮无为而自得闻赤松之清尘兮愿承风乎遗则贵真人之休德兮美往世之登仙与化去而不见兮声名著而日延奇传说之托辰星兮美韩众之得一形穆穆以寢远兮离人群而遁逸因气变而遂曾举兮忽神奔而鬼怪时仿□以遥见兮精皎皎以往来超氛埃而淑邮兮终不反其故都免众患而不惧兮世莫知其所如恐天时之代序兮耀灵晔而西征微霜降而下沦兮悼芳草之先萎聊仿佯而逍遥兮永历年而无成谁可与玩斯遗芳兮长乡风而舒情高阳邈以远兮余将焉所程重曰春秋忽其不淹兮奚久留此故居轩辕不可攀援兮吾将从王乔而娱戏餐六气而饮沆瀣兮漱正阳而含朝霞保神明之清澄兮精气入而粗秽除顺凯风以从游兮至南巢而一息见王子而宿之兮审壹气之和德曰道可受兮而不可传其小无内兮其大无垠毋滑而魂兮彼将自然壹气孔神兮于中夜存虚以待之兮无为之先庶类以成兮此德之门闻至贵而遂徂兮忽乎吾将行仍羽人于丹丘兮留不死之旧乡朝濯发于汤谷兮夕晞余目于

九阳吸飞泉之微液兮怀琬琰之英华玉色頽以晚
颜兮精醇粹而始壮质销铄以沟约兮神要眇以淫
放嘉南州之炎德兮丽桂树之冬荣山萧条而无兽
兮野寂漠其无人载营魄而登霞兮掩浮云而上征
命天阍其开关兮排阊阖而望予召丰隆使先导兮
问太微之所居集重阳入帝宫兮造旬始而观清都
朝发轫于太仪兮夕始临乎于微闾屯余车之万乘
兮纷容与而并驰驾八龙之婉婉兮载云旗之逶蛇
建雄虹之采旄兮五色杂而炫耀服偃蹇以低昂兮
骖连蜷以骄骖骑胶葛以杂乱兮斑漫衍而方行撰
余轡而正策兮吾将过乎句芒历太皓以右转兮前
飞廉以启路阳杲杲其未光兮凌天地以径度风伯
为余先驱兮氛埃辟而清凉凤凰翼其承旗兮遇蓐
收乎西皇彗星以为旂兮举斗柄以为麾叛陆离
其上下兮游惊雾之流波□暖□其曛莽兮召元武
而奔属后文昌使掌行兮选署众神以并轂路曼曼
其修远兮徐弭节而高厉左雨师使径待兮右雷公
而为卫欲度世以忘归兮意恣睢以□拑内欣欣而
自美兮聊偷娱以淫乐涉青云以泛滥游兮忽临睨
夫旧乡仆夫怀余心悲兮边马顾而不行思旧故以
想象兮长太息而掩涕泛容与而遐举兮聊抑志而
自弭指炎帝而直驰兮吾将往乎南疑览方外之荒
忽兮沛瀋而自浮祝融戒而蹕御兮腾告鸾鸟迎
虚妃张咸池奏承云兮二女御九韶歌使湘灵鼓瑟
兮令海若舞冯夷元螭虫象并出进兮形繆□而逶
蛇雌霓便娟以增挠兮鸾鸟轩翥而翔飞音乐博衍
无终极兮焉乃逝以徘徊舒并节以驰骛兮逴绝垠
乎寒门轶迅风于清源兮从颢顼乎层冰历元冥以
邪径兮乘间维以反顾召黔羸而见之兮为余先乎
平路经营四方兮周流六漠上至列缺兮降望大壑
下峥嵘而无地兮上寥廓而无天视倏忽而无见兮
听惝恍而无闻超无为以至清兮与泰初而为邻

游居赋

后汉班彪

夫何事于冀州聊托公以游居历九土而观风亦哲

人之所虞遂发轸于京洛临孟津而北厉想尚父之威虞号苍兕而明誓既中流而叹息美周武之知性谋人神以动作享乌鱼之瑞命瞻淇澳之园林善绿竹之猗猗望常山之峨峨登北岳而高游嘉孝武之干干亲饰躬于伯姬建封禅于岱宗瘞元玉于此丘遍五岳与四渎观沧海以周流鄙臣恨不及事陪后乘之下僚今匹马之独征岂斯乐之足娱且休精于敝邑聊卒岁以须臾

节游赋

魏曹植

览宫宇之显丽实大人之攸居建三台于前处飘飞陛以凌虚连云阁以远径营观榭于城隅亢高轩以回眺缘云霓而结疏仰西岳之松岑临漳淦之清渠观靡靡而无终何渺渺而难殊亮灵后之所处非吾人之所庐于是仲春之月百卉丛生萋萋蔼蔼翠叶朱茎竹林青葱珍果含荣凯风发而时鸟欢微波动而水虫鸣感气运之和顺乐时泽之有成遂乃浮素盖御骅骝命友生携同俦诵风人之所叹遂驾言而出游步北园而驰骛庶翱翔以解忧望洪池之滉漾遂降集乎轻舟浮沉蚁于金罍行觞爵于好仇丝竹发而响厉悲风激于中流且容与以尽观聊永日而忘愁嗟羲和之奋迅怨曜灵之无光念人生之不永若春日之微霜谅遗名之可纪信天命之无常逾志荡以淫游非经国之大纲罢曲宴而旋服遂言归乎旧房

临观赋

前人

登高墉兮望四泽临长流兮送远客春风畅而气通灵草含干兮木交茎丘陵崛兮松柏青南园蔓兮果载荣乐时物之逸豫悲予志之长违叹东山之口勤歌式微以咏归进无路以效功退无隐以营私俯无鳞以游遁仰无翼以翻飞

闲居赋

前人

何吾人之介特去朋匹而无俦出靡时以娱志入无乐以消忧何岁月之若骛复民生之无常感阳春之发节聊轻驾而远翔登高丘以延企时薄暮而起雨

仰归云以载奔遇兰蕙之长圃冀芬芳之可服结春
衡以延伫入虚廊之闲馆步生风之高庑践密迹之
修除即蔽景之元宇翡翠翔于南枝元鹤鸣于北野
青鱼跃于东沼白鸟戏于西渚遂乃背通谷对绿波
藉文茵翳春华丹毂更驰羽骑相过

与从弟君胄书

应璩

间者北游喜欢无量登芒济河旷若发蒙风伯扫涂
雨师洒道按轡清路周望山野亦既至止酌彼春酒
接武茅茨凉过大夏肤寸肴修味逾方丈逍遥陂塘
之上吟咏菀柳之下结春芳以崇佩折若华以翳日
弋下高云之鸟饵出深渊之鱼蒲且赞善便嬛称妙
何其乐哉虽仲尼忘味于虞韶楚人流遁于京台无
以过也班嗣之书信不虚矣来还京都块然独处营
宅滨洛困于嚣尘思乐汶上发于寤寐昔伊尹辍耕
郢恽投竿思致君于有虞济蒸民于涂炭而吾方欲
执耒于山阳沉缙于丹水知其不如古人远矣然山
甫不贪天地之乐曾参不慕晋楚之□亦其志也

节游赋

杨修

尔乃偃息暇豫携手同征游乎北园以娱以逞钦太
□之统气乐乾坤之布灵诞烟熅之纯和百卉挺而
滋生谷风习以顺时挠百物而有成行中林以彷徨
玩奇树之抽英或素华而雪朗或红彩而发赭绿叶
白蒂紫柯朱茎杨柳依依龙钟蔚青纷灼灼以舒葩
芳馥馥以播馨嗟珍果之丛生每异类而绝形稟冲
和以固植信能实而先荣于是回旋详观目周意倦
御于方舟载笑载宴仰溯凉风俯濯纤腕极欢欣以
从容乃升车而来返

梓潼南江泛舟序

唐王勃

咸亨二年六月癸巳梓潼县令韦君以清湛幽凝镇
流靖俗境内无事舣舟于江潭纵观于丘壑渺然有
山林陂泽之思遂长怀悠想周览极思其人则吕
望藉茅于磻溪之阴屈平制芰于涔阳之浦觉瀛洲
方丈森然在目于是间以投壶雠以妙论亦有嘉殽
旨酒鸣弦朗笛以补寻幽之致焉

楚望赋

有
序

李峤

序曰登高能赋谓感物造端者也夫情以物感而
心由目畅非历览无以寄杼轴之怀非高远无以
开沉郁之绪是以骚人发兴于临水柱史詮妙于
登台不其然欤盖人禀情性是生哀乐思必深而
深必怨望必远而远必伤千里开年且悲春目一
叶早落足动秋襟坦荡忘情临大川而永息忧喜
在色陟崇冈以累叹故惜逝口时思深之怨也摇
情荡虑望远之伤也伤则感遥而悼近怨则恋始
而悲终达节弘人且犹轸念苦心志士其能遣怀
是知青山之上每多惆怅之客白苹之野斯见不
平之人良有以也余少历艰虞晚就推择扬子甘
泉之岁潘生秋兴之年曾无侍从之荣顾有池笼
之叹而行藏莫寄心迹罕并岁月推迁志事辽落
栖遑卑辱之地窘束文墨之间以此为心心可知
矣县北有山者即禹贡所谓岐东之荆也岩峣高
敞可以远望余簿领之暇盖尝游斯俯镜八川周
万里悠悠失乡县处处尽云烟不知悲之所集

也岁聿云莫游子多怀援笔慨然遂为赋云尔

眇乎忽然高山之颠露团团而湿草风烈烈而鸣泉
对苍茫之寒日听萧瑟之悲蝉朝独处而无晤吾凝
乎八埏于是繁怀载纆积虑未豁生远情于地表
起遥恨于天末霜尽川长云平野阔恨游襟之浩荡
愤羈怨之忉怛寂焉长想倏若有亡固将言而已叹
信无哀而自伤抚余情之增轸悼人事之多戚曾浮
促之几何而思绪之缠邈思何忧而不入心何虑而
不攒虽感目之一致终寄怀而百端若乃平原杳兮
千里春晴山杳兮万里新迷故乡之处所灭爱旧之
声尘愿寄言而靡托思假翼而无因徒极而尽思
终天性而伤神或复天高朔漠气冷河关汉塞鸿度
吴宫燕还对落叶之驱影怨浮云之惨颜尔乃永眺

无见端居不聊怆归轩之寂寂伤远客之悠悠月临
城晓风送边秋唳鹤闻兮炯不寐凝笳动兮此夜愁
及夫寒野萧条空山寂寥目鄢郢而途眇指邯郸而
路遥伤永离兮浦曲诀远送兮河桥眺平芜之漫漫
瞻远树之迢迢伫然直视嗟矣魂销形将槁木同植
心与飞蓬共飘至如陇上从军汉阳谪戍插羽朝急
要鞭夜赴黯黯塞云苍苍关树甘埋影于异域暂回
首于归路魂逝兮邑里目断兮烟雾步将前而复留
望欲罢而还顾睹惊尘之歎起见征羽之将度泉石
怆而增咽行旅悲而失措亦有捣衣思妇织锦怀人
看粉黛兮无色视桃李兮非春君去兮还无期妾心
兮私自悲高台四望杳无极天涯一去何尽时天涯
兮绵绵问道路兮将几千朝朝暮暮绮窗前长怀此
恨终永年若夫羁旅失职之人放逐流离之客羌抱
恨而谁诉块絨愁而不释于是穷泽际天沧流拂汉
属荣悴兮时改遇炎凉兮节换莫不瞻草木而孤绝
向风烟而永叹故夫望之为体也使人惨凄伊郁惆
怅不平兴废思虑震荡心灵其始也罔兮若有求而
不致也怅乎若有待而不至也悠悠扬扬似出天壤
而涉云庄逡逡巡巡若失其守而忘其真群感方兴
众念始并既情招而思引亦目受而心倾浩兮漫兮
终逾远兮肆兮流兮宕不返兮然后精回魄乱神繭
志否忧愤总集莫能自止虽刚悍武力之夫法度礼
容之士孰不解威失毅废纲遗纪借使据河负海牛
山之美可游左江右湖京台之乐难忘

阙

四字

邈

千秋金石悲兮绮罗伤顾山川以永慨邈日月而诂
央若乃羊公怆惻于岷山孔宣惘然于曲阜王生临
远而沮气颜子登高而白首惟夫作圣明哲宽和敦
厚亦复怛色愀容丧精亏寿故望之感人深矣而人
之激情至矣必也念终怀始感往悲来沿未形而至
造思系无而生哀此欢娱者所以易情而慨慷达识

者所以凝虑而徘徊者也

楚望赋

有
序

刘禹锡

予既谪于武陵其地故郢之裔邑与夜郎诸夷错
系乎天者阴伏阳骄系乎人者风巫气麻是以器
氛浮浮利于楼居城之丽譙实邻所舍四垂无蔽
万景全入因道其远迹所得为楚望赋云

翼轸之野祝融所司阴迫而专专实生沴天濡而雾
土泄而泥气罕淑清兮淫氛曠曠中人之体兮为瘥
为瘵以旷涤烦兮利居高于物外我卜我居于城之
隅宛在藩落丽譙渠渠四阿垂空洞户发极眸子不
运坐陵虚无岁更周流时极惨舒万象起灭森来赋
予棖轩之外群山巃嵒冈陵靡□势若相拱出云见
怪窈蔚森耸露夕霞朝望如飞动檐庑之下大江湏
洞支流合轮泄入云梦羲和望舒出没两涯涵泳之
族聒取呀秋水灌盈漩石飘沙流□轩昂舞于盘
涡逮及收潦如绿醪白石磷磷倒影罗生苹末风
起有文无声悠远烟绵与空苍然湘沅之春先令而
行腊月寒尽温风发荣土高如濡言鸟嚶嚶三星嘒
其晓中植物飒以飘英云归高唐草蔽洞庭目与天
尽神将化并圆方相函游气杳冥熙熙藹藹藻饰群
形□树同丘积空凝青环洲曲塘含景曜明恢台之
气发于春季涉夏如铄逮秋愈炽土山焦熬止水漫
沸翔禽跼堕呀喙垂翅曦赫歊蒸阳极反阴二仪交
精下上相歆云兴天际□若车盖凝□未瞬弥漫霏
惊雷出火乔木糜碎殷地爇空万夫皆废悬溜绁
绁日中见沫移晷而收野无完块少阴之中景物澄
鲜丹叶星房烛耀川原夕月既望曜于丹泉上镜下
冰湔尘濯烟宿丽潜芒独行高躔皓一气之悠悠洁
有形而溢清元杳微明以斐亶想游目于化先夜无
朕以徂征金霞晕乎海壖明星方扬斜汉西悬璇柄
如堕半沉层澜鸡啁晰而晨鸣今日荏苒以腾晶动

植瞭兮已分山川郁乎不平复人寰之喧卑泓浩浩
以营营追向时之景光不可骤得以再更意华胥之
梦还犹仿像而驰精日次于房天未降霜百卉犹泽
水泉收脉故道脔削衍为广斥水禽嬉戏引吭伸翮
纷惊鸣而决起舍彩翠于砂砾时当北风振槁扬埃
萧条边声与雁俱来寒氛委积万窍交激楚云改容
飞雨凝滴洒林递响淅沥梢槭飞电照雪以腾光柔
蔬傲霜而透坼躔次殊气川谷异宜民生其间俗鬼
言夷招三闾以成谣德伏波而构祠投粃粒以鼓□
豢鱣鲂而如蚁蟠木靚深孽妖凭之祈年去厉于蠲
敬祇击鼓肆筵河旁水湄荐诚致祝却落躑踞渚居
□食大掩水物罟张饵啖不可遁伏显举潜缁昼撞
夜触设机沉深如舍于陆彼游儵之琐类咸跳脱于
窘束虽三趾与六眸时或加于一目亦有轻舟拖纶
往复轩轻泛浮驯鸥相逐暮夜澄寂啸歌群族佻音
俚态幽怨委曲逗疏柝于江城引哀猿于山木巢山
之徒桴木开田灼龟伺泽兆食而蟠郁攸起于岩阿
腾绛气而蔽天熏歇雨濡颖垂林颠盗天和而藉地
势谅无劳而有年罢士闲人逸为末作求金渚涘淘
汰灏灏流注瀦沱繁光熠爚贪贾来贸发于怀握无
翼而飞润于丰屋晒耘耕之悒悒徒胼胝以自鞠我
处层轩日星回还阅天数而视民风百态变见乎其
间非耳剽以臆说兮固幽求而纵观观物之余遂观
我生何广覆与厚载岂有形而无情高莫高兮九阍
远莫远兮故园舟有□兮车有辖江山坐兮不可越
吾又安知其所如恍临高以观物

游箴

韩愈

余少之时将求多能蚤夜以孜孜余今之时既饱而
嬉蚤夜以无为呜呼予乎其无知乎君子之弃而小
人之归乎

闲游赋

有
序

徐魁

奈尝读易至谦豫二卦乃废书而叹曰嗟乎天道
其何远哉故逍遥山阿内身外物自保幽静庶无
悔吝遂援毫命牋赋闲游之章云尔

夫居幽而思远兮固先达之所言吾乘元以静拙兮
亦自得于丘园羨马蹄之践雪兮怜泽雉之处樊謁
归来以遂志兮岂荣华之足敦傍山阿而葺宇兮即
树榦而启门尔其山则盘纒深沉穹窿杳謁下枝回
溪上泻悬瀨绝峰交竦深林縈带鱼鸟□以来往烟
雨纷其杂会喧以腾倚之兽荫以偃蹇之木百药争
妍千芳竞馥紫芝所业黄精所蓄元□游啸于阴林
惠风徘徊于阳谷润绵靡而成文泉漱镜而自肃若
乃春华既落秋实就成翔云亹亹流月亭亭高蝉嘶
韵元鸟辞楹气凄清而开朗露冽而含清或彷徨
乎松壑亦偃息乎林□览五圣之余轨酌三古之遗
经信居谦而履福如在豫而忘鸣遵养性于黄术鉴
止足于老生欣松屑之可餌叹黄金之未成至乎身
乖俗偶志罢世纷坐邻沙雪卧接烟云耿长宵而未
寐乍含咏以成文伤孤雁之失伴怀哀鹄之离群何
物类之多感郁余怀其谁语希体逸而心广愿飘然
而高举美人兮岩阿芳非兮袞予天奄冉其将暮山
萧条而无侶发清琴以辅志操长歌以延伫歌曰上
幽岫兮得所钦山蔬陈兮桂酒斟嗟草木兮乐春心
悼日月兮游相寻贵龙凤兮就高深悦张邴兮托萧
森歌响既毕月已沉乃拥荷盖命汉舟越兰渚泛沧
流意超遥其谁恨何俗累之为忧伤路人之狭隘聊
放心以闲游

大游赋

有
序

元吴莱

毗陵道士盛允升东游会稽予闻其风神颖异被
服萧爽盖将自是而汗漫六合者也张君子长约
同送之赋用是作遂题曰大游

夫何一高士兮独旷视乎八区朝吾车之夙驾兮夕

予至于清都仰天路之迢递兮挟陵阳而与俱□刚
风而俯倒景兮浮沆瀣而青霞蜚廉起而前导兮
轂□使后驱素霓夭矫而为纓葦兮神凤褫以
揭旗恍大游之所历兮抚四海其无家惜尘浊之不
可以止息兮吾将抵乎昆仑之遗墟嗟东辕之我踰
兮探宛委之嵌穴帝禹告予以所藏兮发涛江之涨
雪登桐柏之嶄岩兮瞰赤城之嶭嶭飏蓬峤而我欲
径到兮恐蜃楼之明灭□南转而弭节兮过灊霍之
层峰放盛唐之汇怒兮梁鱼□而蹶蛟龙倚巫山之
台观兮莽峨嵋之云松溯丹丘予定不死兮跻羽国
以从容晷浩歌而西迈兮适金天之沃野遵黄河而
吸石室兮王母被发以啸处寻泰一与九嶷兮贯华
阴之幽岨招韩众而许度世兮固肉人之弗遑遽睹
乃北折而亟去兮出雁门之严寒恒岳绵亘乎不绝
兮縋碣石于弥漫搜赤舄于遗榛兮簸楼船乎狂澜
候鸡鸣而直上日观兮吾特痛夫仙学之艰难伊天
地之晦冥兮倏陵谷之迁徙遭女娲之□阜兮顾嵩
少之起经阳都之酒家兮跻王屋之石髓披河上
之灵筌兮摘漆园之奥旨惟小别而千龄兮复一瞬
以万里划狐鸟之丘垤兮洞蟋蟀之年纪心委蛇而
自神兮形旷荡其离滓信吹万之不同兮恒抱一以
终始胡久居乎寰内兮欲绝出于大荒攀建木而与
为陟降兮□铁□于无傍瞻帝车之中运兮闯阊阖
以上征屈轩辕之蜷伏兮耿招摇之耀芒引弧井之
垒落兮炫奎壁之图章翻龙汉之宝历兮彻郁□之
神乡幸置身于一气兮卒齐寿于三光宜凡夫之秽
浊兮又孰契夫大道而翱翔自放怀于天外兮眇累
块于千亿惕世途之嶮巇兮□□蚁之营役岂耽名
而嗜利兮或酣酒而溺色谅金石之销泐兮竟丘垄
之堆积唉吉云之巨薺兮□步景而我服叹甘露之
灵瓮兮和水玉以为食彼策精之有书兮吾尚惧夫
骨策之弗得将蕊珠之不远兮尽蝌蚪而莫识懿周
流而至此兮聿笑傲以言旋乐自然之日月兮揽无
鞅之风烟压洞庭之浩渺兮屣林屋之联绵龙威蚺

蠕而跼踞兮宝镇晃朗而瑛鲜乃霄峥之欲□兮觉
鼎之犹燃大还而蝉蜕兮击小有以鹤翩躬虚
无而不宅兮味淡泊以为渊等古今于一轨兮混生
死其同俨坐在而立蜕兮蕴执袂与拍肩真山泽
之一臞兮夫岂论乎三廛暨九仙固道术之所致兮
曷曲谀而究旃驰笺语而往诀兮却永存于上元

五岳游草序

明王士性

余行游海内五岳举矣作菟裘于白龙溪之浒计了
溟云遂息足焉客有濯缨诣余溪头爰问余曰子好
游乎夫游亦有道耶余曰夫太上天游其次神游又
次人游无之而非也上焉者形神俱化次焉者神举
形留下焉者神为形役然卑之或玩物高之亦采真
客曰其人何如曰若士汗漫于九垓是天游也轩辕
隐几于华胥是神游也尚子长敕断婚嫁谢幼舆置
身丘壑是人游也夫元关寂寥天神邈矣子孰与二
子余曰一丘一壑良吾愿也清溪鉴我心矣尚生云
婚嫁既毕五岳必游余髫□之子视吾年不十四焉
猥云婚嫁姜也就木矣若余则乌能待哉若余则乌
能待哉然则子游其天乎曰唯唯否否余未能莽荡
其马支离其御余游四荒之内未能睹六合之外余
人之畸也请言其人曰夫游浅之乎人也然亦难言
矣思夫驭回九折踵垂百仞鸟道羊肠蛇退猿饮幽
壑无底颠崖半欹履险心悸手足为痺彼无其具犹
勿游也抑有益州恹老牛山叹逝靚遘不常河清难
俟泽啄王雉枥伏灰骥白首青山意兴尽矣彼非其
时犹勿游也若夫石室再闭酒垆寂若七圣路迷三
山风却阴晴未定仆马告痛涕笑邂逅萍梗参差彼
厄之缘犹勿游也然则孰与子曰茂陵虽渴不余倦
矣少文未老曷事卧矣九州已十勿类此子矣昔人
一泉之旁一山之阻神林鬼冢魑魅之穴猿狖所家
鱼龙所宫无不托足焉真吾师也岂此三者于余独
穷嗜与不嗜尔请言子之所嗜曰心志不分者神凝
耳目不眩者虑定故丈人之承蜩也若或掇之也夏
侯氏之倚柱而书也雷霆而婴儿之也余之嗜游类

有然者夫游必具宾主戒车徒提筐罍语曰良辰美景赏心乐事所以试也余游则不择是当其霜雪惨烈手足皴痂波涛撼空帆樯半覆朝畏岚烟夜犯虎迹垂堂不坐千金谁掷余不其然余此委蜕于大冶何惜遇佳山川则游抑或王程有严星分夙驾受命大吏弩矢是荷风波眼底缁尘满袖迂回间道动称掣肘余不其然余此鸡肋于枕上乎何有遇佳山川则游又或百忧愁心万事劳形死生离别黯然销魂云阴月黑风雨连旬追欢买笑强颜掀唇余不其然余此郎当舞袖一付偃师氏之手遇佳山川则游吾视天地间一切造化之变人情物理喜怒顺逆之遭无不于吾游寄焉当其意得形骸可忘物我尽丧吾亦不知何者为玩物吾亦不知何者为采真语未毕客乃起曰夫游道则尽矣子之迹踪类可述乎曰可请崖略而言之神州赤县五岳为尊太元帝時作配自今瑶池宝轴用秘真形谁其窃之负局先生述五岳游齐鲁雍冀贤圣之乡大哉禹功明德未央金台易水侠骨生香梁园邙下艺圃擅场次大河南北诸游岷汶万里其委三吴再起天目汇为太湖蓊气千年作帝王都嗟口乎邯郸乎临淄今之武林姑苏次吴游若夫山川诡幻两越为多天台雁宕余即而家东海三山一苇可跂洞天福地越得十二次越游青神故垒白帝旧城雪销水涨一日江陵瞿塘剑阁自昔不守蜀道虽云难登天亦何有次蜀游六千大楚是称江南茫茫洞庭七泽注焉江汉好游沅湘习怨指云雨兮堪疑望苍梧兮不见次楚游粤土疏理四时多暑高风扬尘滇境咸春碧簪玉笋幻出桂林苍洱昆华兼产奇珍次滇粤游披图九曲是为武夷幔亭云气恍惘霏微莽莽寰区纵余所如嗜而未食惟闽荔支俟将以闽游终焉客敛口而谢曰有是哉是不可以无记遂记之时万历纔十有九稔记者滇西隐吏天台王士性恒叔也

游部总论

淮南子

俶真训

圣人内修道术而不外饰仁义不知耳目之宜而游于精神之和若然者下揆三泉上寻九天横廓六合揅贯万物此圣人之游也若夫真人则动溶于至虚而游于灭亡之野骑蜚廉而从敦圉驰于方外休乎宇内烛十日而使风雨臣雷公役夸父妾宓妃妻织女天地之间何足以留其志

游部艺文二

诗

古诗

无名氏

青青陵上柏磊磊涧中石人生天地间忽如远行客
驱车策驽马游戏宛与洛长衢罗夹巷王侯多第宅
两宫遥相望双阙百余尺极宴娱心意戚戚何所迫

芙蓉池

魏文帝

乘辇夜行游逍遥步西园双渠相溉灌嘉木绕通川
卑枝拂羽盖修条摩苍天惊风扶轮毂飞鸟翔我前
丹霞夹明月华星出云间上天垂光采五色一何鲜
寿命非松乔谁能得神仙遨游快心意保已终百年

杂诗

王粲

吉日简清时从君出西园方轨策良马并驱厉中原
北临清漳水西看柏阳山回翔游广囿逍遥波水间
列车息众驾相伴绿水湄幽兰吐芳烈芙蓉发红晖
百鸟何缤翻振翼群相追投网引潜鲤强弩下高飞
白日已西迈欢乐忽忘归

游西池

晋谢混

悟彼蟋蟀唱信此劳者歌有来岂不疾良游尝蹉跎
逍遥越城肆愿言屡经过回阡被陵阙高台眺飞霞
惠风荡繁囿白云屯层阿景仄鸣琴集水木湛清华
褰裳顺兰沚徙倚引芳柯美人愆岁月迟暮独如何
无为牵所思南荣戒其多

初往新安至桐庐口

宋谢灵运

絺绤虽凄其授衣尚未至感节良已深怀古徒役思
不有千里棹孰申百代意远协尚子心遥得许生计
既及泠风善又即秋水驶江山共闲旷云日相照媚

景夕群物清对玩咸可喜

从游京口北固应诏

前人

玉玺戒诚信黄屋示崇高事为名教用道以神理超
昔闻汾水游今见尘外镳鸣笳发春渚税銮登山椒
张组眺倒影列筵瞩归潮远岩映兰薄白日丽江皋
原隰萸绿柳墟囿散红桃皇心美阳泽万象咸光照
顾已枉维縈抚志惭场苗工拙各所宜终以反林巢
曾是蒙旧想览物奏长谣

于南山往北山经湖中瞻眺

前人

朝旦发阳崖景落憩阴峰舍舟眺回渚停策倚茂松
侧径既窈窕环洲亦玲珑俯视乔木杪仰聆大壑淙
石横水分流林密蹊绝踪解作竟何感升长皆丰容
初篁苞绿箨新蒲含紫茸海鸥戏春岸天鸡弄和风
抚化心无厌览物眷弥重不惜去人远但恨莫与同
孤游非情叹赏废理谁通

从斤竹涧越岭溪行

前人

□鸣诚知曙谷幽光未显岩下云方合花上露犹泫
逶迤傍隈隩迢递陟陁岨过涧既厉急登栈亦凌缅
川渚屡径复乘流玩回转苹萍泛沈深菇蒲冒清浅
企石挹飞泉攀林摘叶卷想见山阿人薜萝若在眼
握兰勤徒结折麻心莫展情用赏为美事味竟谁辨
观此遗物虑一悟得所遣

游豫章西山观洪崖井

谢庄

幽愿平生积野好岁月弥舍簪神区外整褐灵乡陞
林远炎天隔山深白日亏游阴腾鹄岭飞清起凤池
隐暖松霞被容与涧烟移将遂丘中性结驾终在斯

和徐勉出新亭渚

齐谢朓

宛洛佳遨游春色满皇州结轸青郊路回瞰沧江流
日华川上动风光草际浮桃李成蹊径桑榆荫道周

游东田

前人

戚戚苦无惊携手共行乐寻云陟累榭随山望菌阁
远树暖芊芊山烟纷漠漠鱼戏新荷动鸟散余花落
不对芳春酒还望青山郭

薄晚逐凉北楼回望

梁简文帝

- 19 -

平衢望如掌曾雉暖相连断云留去日长山减半天
戏鳧乘汛下渔舟冒浪前

暮游山水赋韵得磧应令 庾肩吾

余春属清夜西园恣游历入径转金輿开桥通画鹢
细藤初上榷新流渐涵磧云峰没城柳电影开岩壁

游山 北周庾信

聊登元圃殿更上增城山不知高几里低头看世间
唱歌云欲聚弹琴鹤欲舞涧底百重花山根一片雨
婉婉藤倒垂亭亭松直竖

登武昌岸望 陈阴铿

游人试历览旧迹但丘墟巴水漾非字楚山断类书
荒城高仞落古柳细条疏烟芜遂若此当不为能居

河曲游 隋卢思道

邺下盛风流河曲有名游应徐托后乘车马践芳洲
丰茸鸡树密遥裔鹤烟稠日上疑高盖云起类重楼
金羈自沃若兰棹成夷犹悬匏动清吹采菱转艳讴
还珂响金埒归袂拂铜沟唯畏三春晚勿言千载忧

春晚从李长史游开道林故山

唐骆宾王

幽寻极幽壑春望陟春台云光栖断树灵影入仙杯
古藤依格上野径约山隈落蕊□风去流莺满树来
兴阑荀御动归路起浮埃

游禹穴回出若邪 宋之问

禹穴今朝到邪溪此路通著书闻太史炼药有仙翁
鹤往笼犹挂龙飞剑已空石帆摇海上天镜落湖中
水底寒云白山边坠叶红归舟何虑晚日暮使樵风

游石门墨山二山相连有禅堂观天下绝境

张说

困轮江上山近在华容县常陟巴丘首天晴遥可见
佳游屡前诺芳月愆幽眷及此符守移欢言临道便
既携赏心客复有送行掾竹径入阴窅松崖上空蒨
草共林一色云与峰万变探窥石门断缘越沙涧转
两山势争雄峰巘相顾眄药妙灵仙宝境华岩壑选
清都西渊绝金地东敞宴池果接园畦风烟迳台殿

高寻去石顶旷览天宇遍千山纷满目百川豁对面
骑来云气迎人去鸟声恋长揖桃源士举世同企羨

早秋与诸子虢州西亭观眺 岑参

亭高出鸟外客到与云齐树点千家小天围万岭低
残虹挂陕北急雨过关西酒榼缘青壁瓜田傍绿溪
微官何足道爱客且相携唯有邻园处依依望不迷

冬日游览 王维

步出城东门试骋千里目青山横苍林赤日团平陆
渭北走邯郸关东出函谷秦地万方会来朝九州牧
鸡鸣咸阳中冠盖相追逐丞相过列侯群公饯光禄
相如方老病独归茂陵宿

入彭蠡经松门观石镜缅怀谢康乐题诗书游
览之志 李白

谢公之彭蠡因此游松门余方窥石镜兼得穷江源
将欲继风雅岂徒清心魂前赏逾所见后来道空存
况属临泛美而无洲渚喧漾水向东去漳流直南奔
空蒙三川夕回合千里昏青桂隐遥月绿枫鸣愁口
水碧或可采金精秘莫论吾将学仙去冀与琴高言

送友人寻越中山水 前人

闻道稽山去偏宜谢客才千岩泉洒落万壑树萦回
东海横秦望西陵绕月台湖清霜镜晓涛白山雪来
八月枚乘笔三吴张翰杯此中多逸兴早晚向天台

漾陂行 杜甫

岑参兄弟皆好奇携我远来游漾陂天地黪惨忽异
色波涛万顷堆琉璃琉璃汗漫泛舟入事殊兴极忧
思集鼉作鲸吞不复知恶风白浪何嗟及主人锦帆
相为开舟子喜甚无氛埃鳧鹭散乱棹讴发丝管啁
啾空翠来沉竿续蔓深莫测菱叶荷花净如拭宛在
中流渤澥清下归无极终南黑半陂已南纯浸山影
动袅窕冲融间船舷冥云际寺水面月出蓝田关
此时骊龙亦吐珠冯夷击鼓神龙趋湘妃汉女出歌
舞金支翠旗光有无咫尺但愁雷雨至苍茫不晓神
灵意少壮几时奈老何向来哀乐何其多

登兖州城楼 前人

东郡趋庭日南楼纵目初浮云连海岱平野入青徐
孤嶂秦碑在荒城鲁殿余从来多古意临眺独踌躇
野望 前人

清秋望不极迢递起层阴远水兼天净孤城隐雾深
叶稀风更落山迴日初沉独鹤归何晚昏鸦已满林
送包何东游 钱起

水国尝独往送君还念兹湖山远近色□旦烟霞时
子好谢公迹常吟孤屿诗果乘扁舟去若与白鸥期
野趣及春好客游欣此辞入云投馆僻采碧过帆迟
江上日回首琴中劳别思春鸿刷归翼一寄杜蘅枝
越中山水 孟郊

自觉耳目胜我来山水州蓬瀛若仿□四野如泛浮
碧嶂几千绕清泉万余流莫穷合沓步孰尽派别游
越水净难污越天阴易收气鲜无隐物目视远更周
举俗媚葱蒨连冬擷芳柔菱湖有余翠茗圃无荒畴
赏异忽已远探奇诚淹留永言终南色去矣销人忧
西郊游 元稹

东风散余沍陂水淡已绿烟芳何处寻杳霭春山曲
新禽哢暄节晴光泛嘉木一与诸君游华觞秋见属
游水南寺 宋余靖

双刹耸浮云层轩绝世尘松溪千盖雨茶圃一旗春
夜梵龕灯暗朝香篆火新暂来犹永日堪羨白莲人
和丁宝臣游甘泉寺 欧阳修

江上孤峰蔽绿萝县楼终日对嵯峨丛林已废姜祠
在事迹难寻楚语讹空余一派寒岩侧澄碧泓渟涵
玉色野僧岂解惜清泉蛮俗那知为胜迹西陵老令
好寻幽时共登临向此游敲危一径穿林樾盘石苍
凉留客歇山深云日变阴晴涧柏岩松度岁青谷里
花开知地暖林间鸟语作春声依依渡口夕阳时却
望层峦在翠微城头暮鼓休催客更待横江弄月归
重游镜曲次韵 林景熙

青眼重逢白发新旧游却忘是前身野鸥妒客招呼
雨江燕随人管领春曾附仙舟追李郭独提诗律继
黄陈镜中恨不移家住山水苍苍老钓纶

郊游

明刘基

草根蝼蝈鸣湖上蒹葭靡繁林溺深绿清池散圆紫
离居昧节序陶情类佳士泛舟出郊甸缓步信所履
壶觞展倡酬及此晴日美啸歌望山川慷慨集悲喜
归雨入禹穴返照射宛委鸟啼树有风帆过烟在水
兴尽各言还适意聊复尔

远游

李攀龙

乘屩万里外言造太微庭云霞曜朱阙日月夹丹楹
群后俨金止仙女纷玉亭随风列以雨出窈而入冥
沆瀣飞素液芝草不复零虹霓为我带杂佩摇华星
濯缨河汉流清波正泠泠俯视世间人泛泛如浮萍

远游篇

吴国伦

一隅非我宅九土安足州迫厄从世人四顾婴百忧
经营瓮盎间区区欲何求金石良易敝曜灵忽以遒
白云启阊阖飘然思远游道逢赤松子仙药为我投
举翼昆仑颠息驾扶木丘扶木挂东海元气鼓洪流
下枝九阳伏上枝一阳浮神鱼戴五城气吐金银楼
登楼瞰列缺六漠何悠悠始知泰初理可与天地侔

纪游

徐爱

壁磴临绝壑兼乘欲疲马屡盘羊肠出还惊虎颌下
逼险悔初进稍纵觊复假如何穷探心阻困每未舍
无端口忧虞中止固由我回思竞利人何殊履危者
行旅部纪事

说苑权谋篇郑桓公会封于郑暮舍于宋东之逆
旅逆旅之叟从外来曰客将焉之曰会封于郑逆旅
之叟曰吾闻之时难得而易失也今客之寝安殆非
封也郑桓公闻之援辔自驾其仆接淅而载之行十
日夜而至厘何与之争封以郑桓公之贤微逆旅之
叟几不会封也

左传庄公二十二年陈人杀其太子御寇陈公子完
奔齐齐侯使敬仲为卿辞曰羁旅之臣幸若获宥及
于宽政赦其不闲于教训而免于罪戾弛于负担君
之惠也所获多矣敢辱高位以速官谤请以死告
僖公二年晋伐虢使荀息假道于虞曰今虢为不道

保于逆旅以侵敝邑之南鄙敢请假道以请罪于虢
按注逆旅客舍也虢稍遣人分依客舍以聚众抄晋边邑

五年晋复假道于虞以伐虢宫之奇谏弗听许晋使宫之奇以其族行曰虞不腊矣

襄公二十一年秋栾盈出奔过于周周西鄙掠之辞于行人曰天子陪臣盈得罪于王之守臣将逃罪罪重于郊甸无所伏窜敢布其死昔陪臣书能输力于王室王施惠焉其子廩不能保任其父之劳大君若不弃书之力亡臣犹有所逃若弃书之力而思廩之罪臣戮余也将归死于尉氏不敢还矣敢布四体唯大君命焉王曰尤而效之其又甚焉使司徒禁掠栾氏者归所取焉使候出诸轘辕

二十六年楚伍举与声子相善伍举娶于王子牟王子牟为申公而亡楚人曰伍举实送之伍举奔郑将遂奔晋声子将如晋遇之于郑郊班荆相与食而言复故声子曰子行也吾必复子

昭公七年楚子成章华之台愿与诸侯落之大宰薳启疆来召公公将往梦襄公祖梓慎曰君不果行襄公之适楚也梦周公祖而行今襄公实祖君其不行子服惠伯曰行先君未尝适楚故周公祖以道之襄公适楚矣而祖以道君不行何之三月公如楚

仪礼聘礼使者受命遂行舍于郊斂口若过邦至于竟使次介假道束帛将命于朝曰请帅奠币按注帅道也请道已道路所当由

晋语范宣子与酈大夫争田久而无成宣子欲攻之问于孙林父孙林父曰旅人所以事子也唯事是待按注旅客也言客寄之人不敢违命

庄子山木篇阳子之宋宿于逆旅逆旅人有妾二人其一人美其一人恶恶者贵而美者贱阳子问其故逆旅小子对曰其美者自美吾不知其美也其恶者自恶吾不知其恶也阳子曰弟子记之行贤而去自贤之行安往而不爱哉

韩子说林篇鸱夷子皮事田成子田成子去齐走而

之燕鵲夷子皮负传而从至望邑子皮曰子独不闻涸泽之蛇乎涸泽蛇将徙有小蛇谓大蛇曰子行而我随之人以为蛇之行耳必有杀子不如相衔负我以行人必以我为神君也今子美而我恶以子为我上客千乘之君也以子为我使者万乘之卿也子不如为我舍人田成子因负传而随之至逆旅逆旅之君待之甚敬因献酒肉

温人之周周不纳客问之曰客耶对曰主人问其巷人而不知也吏因囚之君使人问之曰子非周人也而自谓非客何也对曰臣少也诵诗曰普天之下莫非王土率土之滨莫非王臣今君天子则我天子之臣也岂有为人之臣而又为之客哉故曰主人也君使出之

列子汤问篇韩娥东之齐匱粮过雍门鬻歌假食既去而余音繞梁欂三日不绝左右以其人弗去过逆旅逆旅人辱之韩娥因曼声哀哭一里老幼悲愁垂涕相对三日不食

战国策张仪之楚贫舍人怒而欲归张仪曰子必以衣冠之敝故欲归待我为子见楚王张子见楚王南后郑口以金千斤进左右

汉书郑当时传当时迁大司农使视决河自请治行五日上曰吾闻郑庄行千里不赍粮治行者何也

后汉书樊传为天水太守道不拾遗行旅至夜

聚衣装道傍曰以付樊公

刘翊传翊字子相颍川颍阴人也家世丰产常能周施而不有其惠曾行于汝南界中有陈国张季礼远赴师丧遇寒冰车毁顿滞道路翊见而谓曰君慎终赴义行宜速达即下车与之不告姓名自策马而去范式传式友人孔嵩辟公府之京师道宿下亭盗共窃其马寻问知其嵩也乃相责让曰孔仲山善士岂宜侵盗乎于是送马谢之

臧洪传洪中平末太守张超请为功曹时讨鹵校尉公孙瓒与大司马刘虞有隙超乃遣洪诣虞共谋其难行至河间而值幽冀交兵行涂阻绝因寓于袁绍

魏志胡质传质子威咸熙中官至徐州刺史

注

晋阳

秋曰威字伯虎少有志尚厉操清白质之为荆州也威自京都省之家贫无车马僮仆威自驱驴单行拜见父停厩中十余日告归临辞质赐其绢一匹为道路粮威每至客舍自放驴取樵炊爨食毕复随旅进道往还如是质帐下都督素不相识先其将归请假还家阴资装百余里要之因与为伴每事佐助经营之又少进饮食行数百里威疑之密诱问乃知其都督也因取向所赐绢答谢而遣之

搜神记吴人费季久客于楚时道多劫妻常忧之季与同辈旅宿庐山下各相问出家几时季曰吾去家已数年矣临来与妻别就求金钗以行欲观其志当与吾否耳得钗乃以着户楣上临发失与道此钗故当在户上也尔夕其妻梦季曰吾行遇盗死已二年若不信吾言吾行时取汝钗遂不以行留在户楣上可往取之妻觉揣钗得之家遂发丧后一年余季乃归还

晋书阮瞻传瞻常群行冒热渴甚逆旅有井众人竞趋之瞻独逡巡在后须饮者毕乃进其夷退无竞如此

桑虞传虞常行寄宿逆旅同宿客失脯疑虞为盗虞默然无言便解衣偿之主人曰此舍数失鱼肉鸡鸭多是狐狸偷去君何以疑人乃将脯主至山冢间寻求果得之客求还衣虞投之不顾

周书庾信传梁元帝即位信来聘于我属大军南讨遂留长安陈氏与朝廷通好南北流寓之人各许还其旧国陈氏乃请王褒及信等十数人高祖唯放王克殷不害等信及褒并留而不遣寻征为司宗中大夫信虽位望通显常有乡国之思乃作哀江南赋以致其意云

隋书郎茂传恒山赞治王文同与茂有隙奏茂朋党徙且末郡茂怡然受命不以为忧在途作登垄赋以

自慰

唐书马周传周武德中补州助教不治事刺史达奚恕数咎让周乃去客密州赵仁本高其才厚以装使入关留客汴为浚仪令崔贤所辱遂感激而西舍新丰逆旅主人不之顾周命酒一斗八升悠然独酌众异之

杨再思传再思至京师舍逆旅有盗窃其衣囊再思遇之盗窘谢再思曰尔贫苦故至此囊中檄无所事幸留它物可持去初不为人言但假贷以还

采清课杜子美促织微细哀音动人之作初谓偶然及入豫章都城秋凉作客四壁寒蛩而一灯荧荧忆悬藜夜话白云舍冷不胜凄然乃知此老体物之妙造境愈淡造语弥精

唐国史补熊执易应举道中秋雨泥潦逆旅有人同宿而屡叹息者问之乃尧山令樊泽将赴制举驴劣不能进执易乃辍所口马并囊中缣帛悉与泽以遂其往诘朝执易乃东归

渑池道中有车载瓦瓮塞于隘路属天寒冰雪峻滑进退不得日向暮官私客旅群队铃铎数千罗拥在后无可奈何有客刘颇者扬鞭而至问曰车中瓮直几钱答曰七八千颇开囊取缣立偿之命僮仆登车断其结络悉推瓮于崖下须臾车轻得进群噪而前北梦琐言唐罗员外袞成都临邛人应进士举文学优赡操尚甚高唐大顺中策名不归故乡时属丧乱朝廷多故契阔兵难备历饥寒蜀先主致书于翰林令狐学士与侍郎选书记一员欲以桂阳应聘外郎谓知己曰誓拥马通衢服弊布衣以俟外朝无复西归为鲁国东家丘也竟通朝籍终于梁礼部员外郎蜀人有志者唯外郎乎扬子云二媳亡遗骸葬于蜀与夫延陵季子何相远哉近代李频黄匪躬皆岭表人频即遗其糟糠别婚士族黄即三十年不返乡里于时妻母俱在又何心乎

稽神录杨彦伯庐陵新淦人也童子科及第天福辛酉岁赴选至华阴舍于逆旅时京国多艰朝无亲识

选事不能如意亦甚忧闷会豫章郎吏姓杨乡里旧知同宿于是因教已云凡行旅至此未尝不祷于天必获梦寐之报纵无梦则此店之姬亦能知方来事苟获一言亦可矣彦伯因留一日精意以祠之尔夕竟无梦既曙店姬方迎送他客又无所言彦伯愈怏怏将行忽失所著鞋诘责僮仆甚喧既即路姬乃从而呼之曰少年何其喧耶彦伯因具道其事姬曰嘻此即神告也夫将行而失其鞋则是事皆不谐矣非徒如此而已也京国将有乱当不可复振君当百艰备历然足为忧也子之爵禄皆在江淮官当至门下侍郎彦伯因思之江淮安得有门下侍郎遂行至长安适会大驾西幸随至岐陇梁寇围城彦伯辛苦备至驾既出城彦伯逃还吉州刺史彭珍厚遇之累摄县邑伪吴平江西复见选用登朝至户部侍郎会临轩策命齐王彦伯摄为门下侍郎行事既受命思店姬之言大不悦数月遂卒

北梦琐言后唐明宗皇帝微时随蕃将李存信巡边宿于雁门逆旅逆旅媼方娠帝至媼慢不时具食腹中儿语谓母曰天子至宜速具食声闻于外媼异之遽起亲奉庖爨敬事尤谨帝以媼前倨后恭诘之曰公贵不可言也问其故具道娠中腹语事帝曰老媼逊言惧吾辱耳后果如其言

渑水燕谈录卢多逊南迁朱崖逾岭憩一山店店姬举止和淑颇能谈京华事卢访之姬不谓卢也曰家故汴都累代仕族一子事州县卢相公违法治一事子不能奉诬窜南方到方周岁尽室沦丧独残老躯流落居此意有所待卢相欺上罔下倚势害物天道昭昭行当南窜未亡间庶见于此以快宿憾尔因号呼泣下卢不待食促驾而去

湘山野录鼎州甘泉寺介官道之侧嘉泉也便于漱酌行客未有不舍车而留者始寇莱公南迁日题于东槛曰平仲酌泉经此回望北阙黯然而行未几丁晋公又过之题于西槛曰谓之酌泉礼佛而去后范补之讽安抚湖南留诗于寺云平仲酌泉回北望谓

之礼佛向南行烟岚翠锁门前路转使高僧厌宠荣
诗碑犹存

梦溪笔谈赵阅道为成都转运使出行部内惟携一
琴一鹤坐则看鹤鼓琴尝过青城山遇雪舍于逆旅
逆旅人不知其使者也或慢狎之公颓然鼓琴不问
过庭录湘潭进士胡景佑好问博学信义人也旧与
先子相识京邑己酉冬避地至潭却乏余资行装垂
罄胡亦困居乃以千钱为赠曰某虽贫里中有所贷
公今流落穷途少助行色先公谢其意而却之

篷枕夜话余夜投屯溪胡氏酒馆馆人醉归踉跄与
余接语又引余袖令视其二女二女匿笑帷中不肯
出时于灯后闪露偶一瞥眼皆殊色也女又摘琵琶
弦唱蔡郎歌断续窃袅余幙被不能寐知其欲为眩
乱乃诡呼店姬寄行橐久之检视橐中悉布纳草屨
始寂然不复弄姿越二日上贾人船有操舟健儿与
余仆语宛转诘之即其二婿也往来溪中如织岁一
二省家不能信宿留也

画墁录西京留台李建中博雅多艺其子宗鲁善相
人一年春榜之京师命择婿行次任村逆旅方就食
有丈夫荷布囊从驱驴亦就食于逆旅宗鲁一见前
揖寒温延之共案询其所自曰今春不第将还洛也
宗鲁不复之京师与之同归洛中其父诘之曰今既
得贵婿可复回矣

清波杂志至和三年刘原父敞使契丹檀州守李翰
劳其行役刘云跋涉不辞但山路迂曲自过长兴却
西北行六程到柳河方稍南行意甚不快又云闻有
直路自松亭关往中京纔十余程自柳河纔二百余
里翰笑曰尽知所示乃初踏逐修馆舍已定至今迂
曲后范中济子奇出使虏道使者由迂路以示广远
范诘之曰抵云中有直道旬日可至何乃出此耶虏
情得嘿然缘二公素精地理学故毋得而欺辉出疆
过白沟日日行六七十里若百余里穷日力方到或
问今日之程行远答曰此中宿食顿地理远近初不
定盖亦取夫馆舍之便

游部纪事

列子周穆王篇周穆王肆意远游命驾八骏之乘右服骝而左绿耳右骖赤骥而左白主车则造父为御为右次车之乘右服渠黄而左逾轮左骖盗骊而右山子柏夭主车参百为御奔戎为右驰驱千里至于巨搜氏之国巨搜氏乃献白鹄之血以饮王具牛马之湏以洗王之足及二乘之人已饮而行遂宿于□□之阿赤水之阳别日升□□之丘以观黄帝之宫而封之以诒后世遂宾于西王母觞于瑶池之上西王母为王谣王和之其辞哀焉乃观日之所入一日行万里王乃叹曰于乎予一人不盈于德而谐于乐后世其追数吾过乎

说苑正谏篇齐景公游于海上而乐之六月不归颜烛趋进谏曰君乐治海上而六月不归彼傥有治国者君且安得乐此海也景公遂归中道闻国人谋不内矣

楚昭王欲之荆台游司马子綦进谏曰荆台之游左洞庭之波右彭蠡之水南望猎山下临方淮其乐使人遗老而忘死人君游者尽以忘其国愿大王勿往游焉王曰荆台乃吾地也有地而游之子何为绝我游乎怒而击之于是令尹子西驾安车四马径于殿下曰今日荆台之游不可不观也王登车而拊其背曰荆台之游与子共乐之矣步马十里引辔而止曰臣不敢下车愿得有道大王肯听之乎王曰第言之令尹子西曰臣闻之为人臣而忠其君者爵禄不足以赏也为人臣而谏其君者刑罚不足以诛也若司马子綦者忠臣也若臣者谏臣也愿大王杀臣之躯罚臣之家而禄司马子綦王曰若我能止听公子独能禁我游耳后世游之无有极时奈何令尹子西曰欲禁后世易耳愿大王山陵崩□为陵于荆台未尝有持钟鼓管弦之乐而游于父之墓上者也于是王还车卒不游荆台

指武篇孔子北游东上农山子路子贡颜渊从焉孔子喟然叹曰登高望下使人心悲

列子仲尼篇子列子好游壶丘子曰御寇好游游何所好列子曰游之乐所玩无故人之游也观其所见我之游也观其所变游乎游乎未有能辨其游者壶丘子曰御寇之游固与人同欤而曰固与人异欤凡所见亦恒见其变玩彼物之无故不知我亦无故务外游不知务内观外游者求备于物内观者取足于身取足于身游之至也求备于物游之不至也于是列子终身不出自以为不知游壶丘子曰游其至乎至游者不知所适至观者不知所口物物皆游矣物物皆观矣是我之所谓游是我之所谓观也故曰游其至矣乎游其至矣乎

庄子秋水篇庄子与惠子游于濠梁之上庄子曰倏鱼出游从容是鱼乐也惠子曰子非鱼安知鱼之乐庄子曰子非我安知我不知鱼之乐

史记太史公自序太史公有子曰迁迁年二十而南游江淮上会稽探禹穴窥九疑浮于沅湘北涉汶泗讲业齐鲁之都观孔子之遗风乡射邹峰口困鄱薛彭城过梁楚以归

后汉书向长传长潜隐于家读易至损益卦叹曰吾已知富不如贫贵不如贱但未知死何如生耳建武中男女娶嫁既毕敕断家事勿相关当如我死也于是遂肆意与同好北海禽庆俱游五岳名山竟不知所终

山栖志荆州记载鹿门事云庞德公居汉之阴司马德操宅州之阳望衡对宇欢情自接泛舟褰裳率尔休畅寄沮水幽胜云稠木傍生凌空交合危嶙倾岳恒有落势风泉传响于青林之下岩猿流声于白云之上游者常苦目不周玩情不给赏

卧游录阮籍志气宏放傲然独得或闭户读书累月不出或登山临水经日忘归当其得意忽忘形骸襄阳记汉侍中习郁于岷山南依范蠡养鱼法作鱼池池边有高堤种竹及长楸芙蓉菱芡覆水是游燕名处也山简每临此池未尝不大醉而还曰此是我高阳地也

晋书嵇康传康尝采药游山泽会其得意忽焉忘返
时有樵苏者遇之咸谓神至汲郡山中见孙登康遂
从之游

孙统传统家于会稽性好山水乃求为令转在吴
宁居职不留心碎务纵意游肆名山胜川靡不穷究
孙绰传绰少与高阳许询俱有高尚之志居于会稽
游放山水十有余年乃作遂初赋以致其意

郭文传文少爱山水尚嘉遁年十三每游山林弥旬
忘反父母终服毕不娶辞家游名山历华阴之崖以
观石室之石函洛阳陷乃步担入吴兴余杭大辟山
中穷谷无人之地倚木于树苦覆其上而居焉

谢安传安放情丘壑每游赏必以妓女从

王羲之传羲之既去官与东士人士尽山水之游不
远千里遍游东中诸郡穷诸名山泛沧海叹曰我卒
当以乐死

世说新语许掾好游山水而体便登陟时人云许非
徒有胜情实有济胜之具

简文入华林园顾谓左右曰会心处不必在远翳然
林水便自有濠濮间想也觉鸟兽禽鱼自来亲人

宋书郑鲜之传鲜之历都官尚书性好游行命驾或
不知所适随御者所之

谢灵运传灵运以名辈才能应参时政初被召便以
此自许既至文帝唯以文义见接每侍上宴谈赏而
已王昙首王华殷景仁等名位素不逾之口见任遇
灵运意不平多称疾不朝直穿池植植种竹树董驱
课公役无复期度出郭游行或一日百六七十里经
旬不归既无表闻又不请急上不欲伤大臣讽旨令
自解灵运乃上表陈疾上赐假东归灵运以族东归
而游娱宴集以夜续昼复为御史中丞傅隆所奏坐
以免官是岁元嘉五年灵运既东还与族弟惠连东
海何长瑜颍川荀雍太山羊璇之以文章赏会共为
山泽之游时人谓之四友灵运因父祖之资生业甚
厚奴僮既众义故门生数百凿山浚湖功役无已寻
山陟岭必造幽峻岩嶂千重莫不备尽登蹻常着木

履上山则去前齿下山去其后齿尝自始宁南山伐木开径直至临海从者数百人临海太守王琇惊骇谓为山贼徐知是灵运乃安又要琇更进琇不肯灵运赠琇诗曰邦君难地险旅客易山行在会稽多徒众惊动县邑太守孟顗事佛精恳而为灵运所轻尝谓顗曰得道应须慧业文人生天当在灵运前成佛必在灵运后顗深恨此言会稽东郭有回踵湖灵运求决以为田太祖令州郡履行此湖去郭近水物所出百姓惜之顗坚执不与灵运既不得回踵又求始宁岙湖为田顗又固执灵运谓顗非存利民正虑决湖多害生命言论毁伤之与顗遂构讎口因灵运横恣百姓惊扰乃表其异志发兵自防露板上言灵运驰出京都诣阙上表曰臣自抱疾归山于今三载居非郊郭事乖人间幽栖穷岩外缘两绝守分养命庶毕余年忽以去月二十八日得会稽太守臣顗二十七日疏云比日异论噂此虽相了百姓不许寂默今微为其防披疏骇惋不解所由便星言奔驰归骨陛下及经山阴防卫彰赫彭排马枪断截衢巷侦逻纵横戈甲竟道不知微臣罪为何事及见顗虽曰见亮而装防如此唯有罔惧臣昔忝近侍豫蒙天恩若其罪迹炳明文字有证非但显戮司败以正国典普天之下自无容身之地今虚声为罪何酷如之夫自古谗谤圣贤不免然致谤之来要有由趣或轻死重气结党聚群或勇冠乡邦剑客驰逐未闻俎豆之学欲为逆节之罪山栖之士而构陵上之衅今影迹无端假谤空设终古之酷未之或有匪吝其生实悲其痛诚复内省不疚而抱理莫申是以牵曳疾病束骸归款仰凭陛下天鉴曲临则死之日犹生之年也臣忧怖弥日羸疾发动尸存恍惚不知所陈太祖知其见诬不罪也不欲使东归以为临川内史赐秩中二千石在郡游放不异永嘉为有司所纠司徒遣使随州从事郑望生收灵运灵运执录望生兴兵叛逆遂有逆志为诗曰韩亡子房奋秦帝鲁连耻本自江海人忠义感君子追讨擒之送廷尉治罪廷尉奏灵

运率部众反叛论正斩刑上爱其才欲免官而已彭城王义康坚执谓不宜恕乃诏曰灵运罪衅累仍诚合尽法但谢元勋参微管宜宥及后嗣可降死一等徙付广州

孔淳之传淳之少有高尚爱好坟籍为太原王恭所称居会稽剡县性好山水每有所游必穷其幽峻或旬日忘归尝游山遇沙门释法崇因留共止遂停三载法崇叹曰缅想人外三十年矣今乃倾盖于兹不觉老之将至也及淳之还反不告以姓

南史袁粲传粲领丹阳尹粲负才尚气爱好虚远虽位任隆重不以事物经怀独步园林诗酒自适家居附郭每杖策逍遥当其意得悠然忘反郡南一家颇有竹石率尔步往亦不通主人直造竹所啸咏自得主人出语笑款然俄而车骑羽仪并至门方知是袁尹又尝步屣白杨郊野间道遇一士大夫便呼与酣饮口日此人谓被知顾到门求进粲曰昨饮酒无偶聊相要耳竟不与相见尝作五言诗言访迹虽中宇循寄乃沧洲盖其志也

莲社高贤传宗炳雅好山水往必忘归西陟荆巫南登衡岳因结宇山中怀尚平之志以疾还江陵叹曰老病俱至名山不可再登唯澄怀观道卧以游之凡所游履悉图之于室谓人曰抚琴动操欲令众山皆响

玉润杂书陶通明既隐茅山自号华阳隐君复遍游名山每经涧谷必坐卧其间吟咏不已谓门人曰吾见朱门广厦虽识其华乐而无欲往之心望高岩瞰大泽虽知难止自常欲就之永明中求禄得辄差舛不尔岂得今日之事乎

卧游录梁昭明太子性爱山水尝泛舟后池番禺侯轨盛称此中宜奏女乐太子不答咏左思招隐诗云何必丝与竹山水有清音

南史刘吁传吁尝着谷皮巾披衲衣每游山泽辄留连忘返神理闲正姿貌甚华在林谷之间意气弥远或有遇之者皆谓神人

徐君蒨传君蒨为梁湘东王镇西谘议参军颇好声色时载伎肆意游行荆楚山川靡不毕践朋从游好莫得见之

世说新语补王沙弥母终后遨游巩洛悦其山水与范阳卢元明巨鹿魏季景结侣同契往天陵山浩然有终焉之志

北齐书邢邵传邵少在洛阳会天下无事与时名胜专以山水游晏为娱不暇勤业属尚书令元罗出镇青州启为府司马遂在青土终日酣赏尽山泉之致文中子魏相篇子游马颊之谷遂至牛首之溪登降信宿从者乐姚义竇威进曰夫子遂得潜乎子曰潜虽伏矣亦孔之昭威曰闻朝廷有召子议矣子曰彼求我则如不我得执我仇仇亦不我力姚义曰其车既载乃弃尔辅竇威曰终逾绝险曾是不意子喟然遂歌正月终焉既而曰不可为矣

卧游录王休高尚不亲势利常与名僧数人或跨驴或骑牛寻访山水自谓结物外之游

世说新语补王无功有田十六顷在河渚间奴婢数人自课种黍春秋酿酒养鳧雁蒔药草自供与仲长子光服食养性游北山东皋著书自号东皋子

唐书李白传白尝侍帝醉使高力士脱力士素贵耻之撻其诗以激杨贵妃帝欲官白妃辄沮止白自知不为亲近所容恳求还山帝赐金放还白浮游四方尝乘舟与崔宗之自采石至金陵着宫锦袍坐舟中旁若无人代宗立以左拾遗召而白已卒年六十余白晚好黄老度牛渚矶至姑熟悦谢家青山欲终焉及卒葬东麓

卧游录李白游江淮去之齐鲁入吴至长安北抵赵魏燕晋西涉邠岐历商于至洛阳游梁最久复之齐鲁南游淮泗再入吴转金陵上秋浦浔阳卧庐山后流夜郎遂泛洞庭上峡江至巫山

唐书杜甫传甫往来梓夔间大历中出瞿唐下江陵溯沅湘以登衡山因客耒阳游岳祠大水遽至涉旬不得食县令具舟迎之乃得还甫少与李白齐名尝

从白及高适过汴州酒酣登吹台慷慨怀古人莫测也

王维传维别墅在辋川地奇胜有华子冈欽湖竹里馆柳浪茱萸泝辛夷坞与裴迪游其中赋诗相酬为乐

张志和传志和以亲既丧不复仕居江湖自称烟波钓徒颜真卿为湖州刺史志和来谒真卿以舟敝漏请更之志和曰愿为浮家泛宅往来苕霅间

柳浑传浑罢政事后数日置酒召故人出游酣肆乃还旷然无黜免意

卢纶传纶大中九年召为左仆射始被召自以当辅政既失志故内怨望数移病不事事遨游林墅累日一还令狐绹恶之罢仆射以检校司空守太子太师山栖志王士源者藻思清远深鉴文理好游名山年十八首事陵山践止恒岳资求通元丈人又过苏门问道隐者元知运入太行采药经王屋小有洞至太白习隐诀终南修亢仓子九篇

石林诗话庆历八年王则叛贝州既诛始析河北大名定武真定高阳为四路制帅更命儒臣以辑边备魏公自郢州徙镇各大兴方略无不自亲尝有题养贞亭诗云所期清策虑不是爱精神又云吏民还解否吾岂苟安人其志可见矣郡圃号众春会岁饥涉春未尝一游陈荐在幕府以诗请公云水底鱼龙思鼓吹沙头鸥鹭望旌旗公亟答之云细民沟壑方援手别馆莺花任送春在镇五年政声流闻自是天下遂属以为相

续诗话刘□字孟节弃官隐居好游山常独挈饭一罍穷探幽险无所不至夜则宿于岩石之下或累日乃返不畏虎豹蛇

闻见前录司马温公既居洛时往夏院展墓省其兄郎中公为其群从乡人说书讲学或乘兴游荆华诸山以归多游寿安山买磁□畔为休息之地尝同范景仁过韩城抵登封憩峻极下院登嵩顶入崇福宫会善寺由轘辕道至龙门游广爱奉先诸寺上华严

阁千佛岩寻高公堂渡潜溪入广化寺观唐郭汾阳铁像涉伊水至香山皇龕憩石楼临八节滩过白公显堂凡所经从多有诗什自作序曰游山录士大夫争传之公不喜肩輿山中亦乘马路险策杖以行故嵩山题字曰登山有道徐行则不困措足于平稳之地则不跌慎之哉其旨远矣

宋史隐逸传张愈字少愚益州郫人乐山水遇有兴虽数千里辄尽室往遂浮湘沅观浙江升罗浮入九嶷买石载鹤以归

漫笑录苏子瞻任凤翔府节度判官章子厚为商州令同试永兴军进士刘原父为帅皆以国士遇之二人相得欢甚同游南山诸寺寺有山魑为祟客不敢宿子厚宿山魑不敢出抵仙游潭下临绝壁万仞岸甚狭横木架桥子厚推子瞻过潭书壁子瞻不敢过子厚平步以过用索系树蹶之上下神色不动以漆墨濡笔大书石壁上曰章惇苏轼来游子瞻拊其背曰子厚必能杀人子厚曰何也子瞻曰能自命者能杀人也子厚大笑

卧游录苏子瞻初谪黄州布衣芒屨出入阡陌多挟弹击江水与客为娱乐每数日必一泛舟江上听其所往乘兴或入旁郡界经宿不返晚贬岭外无一日不游山水

东坡志林绍圣元年十月十二日与幼子过游白水佛迹院浴于汤池热甚其源殆可熟物循山而东少北有悬水百仞山八九折折处辄为潭深者□石五丈不得其所止雪溅雷怒可喜可畏水涯有巨人迹数十所谓佛迹也暮归倒行观山烧火甚俯仰度数谷至江山月出击汰中流掬弄珠璧到家二鼓复与过饮酒食余甘煮菜顾影颓然不复甚寐书以付过山栖志米芾风韵潇远趣向高洁山水佳处游题殆遍范景仁致仕一朝思乡里遂径行入蜀至成都日与乡邻乐饮散财于亲旧之贫者遂游峨嵋青城山下巫峡出荆门凡暮岁乃还京师

林逋恬淡好古客游江淮久之归杭结庐西湖之孤

山二十年足不及城市尝蓄两鹤或泛小艇出游客至则童子开笼纵鹤逋遂放植而归

朱文公每经行处闻有佳山水虽迂涂数十里必往游焉携樽酒一壶银杯大几容升时引一杯登览竟日未尝厌倦又尝欲以木作华山图刻山水凹凸之势合木八片为之以雌雄笋相入可以折度一人之力足以负之每出则以自随

齐东野语杨凝式居洛日将出游仆请所之杨曰宜东游广爱寺仆曰不若西游石壁寺凝式曰姑游广爱仆又以石壁为请凝式曰姑游石壁闻者为之抚掌

辟寒黄哲番禺人性好山水结庐蒲涧栖息其中往来罗浮峡山南华诸名胜自以为未足乃辞家度庾岭过吴楚游燕齐间当风雪时泊舟秦淮遇朱文昭涂口辈相与握手吟口沽酒大噱

霏雪录顾号半痴老人放浪山水间以绘事自娱每出游奇峦异嶂珍木怪石辄瞪目凝视久之境与意会便欣然忘返

山栖志王冕买舟下东吴渡大江入楚淮历览名山川或遇奇才侠客谈古豪杰事即呼酒共饮慷慨悲吟人目为狂奴北游燕馆泰不花家泰荐之曰不满十年此中狐兔游矣隐九里山种豆三亩粟倍之树梅花千桃杏居其半芋一区薤韭各百本引水为池种鱼千余头结茅庐三间自题为梅花屋

方正学曰往者壬戌七月之望予偕叶夷仲张廷璧林公辅陈元采夜登巾山绝顶饮酒望月纵谈千古竟夕不眠予谓叶君曰昔苏子瞻夜登黄楼观王定国诸公登桓山吹笛饮酒乘月而归以为太白死三百年无此乐矣斯乐又子瞻死三百年后所无也诸君皆大笑

宋景濂性疏旷每携友生徜徉梅花间轰笑竟日或独卧长林下看晴雪堕松顶云出没岩扉间悠然以自适尝与弟子入龙门山著书二十四篇曰龙门凝道记

孙太初关中人年十八入终南山继入太白山嚼草木居息大石口上时有所得赤脚散发走山最高峰持古松根扣巨奇石以歌久之东入华南浮湘汉登衡祝融峰返嵩山度汴谒阙里思孔子遗风依依不忍舍去遂上岱宗日观峰观夜半日出沧海中发狂大叫自以为奇伟复南经吴入越探会稽禹穴访天台石桥返渡扬子江访殷云霄东海上与登孤山海门月余别去

游部杂录

诗经邶风泉水章驾言出游以写我忧

礼记内则从长者而上丘陵则必乡长者所视

淮南子原道训所谓乐者岂游云梦沙丘耳听九韶六鼗口味煎熬芬芳驰骋夷道钓射鹄□之乐乎吾所谓乐者人得其得者

避暑录话钱塘西湖建康钟山皆士大夫愿游而不获者仕宦适至未有不厌足所欲两郡余皆辱居之在钱塘十月适虏犯京师信息未通日望涕泣引首北向何暇顾其他仅以祈晴一至天竺而已建康亦留半岁正当冬春之间出师待敌寝食且废钟山虽兵火残破之余形势故在六朝遗迹故事班班犹可数城中但见屹然在侧尔而少从先君入峡瞿塘□瀕高唐白帝城皆天下绝险奇异乃一二纵观至今犹历历在目晚往来浙东七里濂金华三洞诸胜处每至辄留数日非兴尽不归乃知山林丘壑亦各有分非轩冕者所可常得天固付之山人野老也

蒙斋笔谈孔子言仁者静智者动吾观自古功名之士类皆好动不但兴作事业虽起居语默之间亦不能自己王荆公平生不喜坐非睡即行居钟山每早饭已必跨驴一至山中或之西庵或之定林或中道舍驴遍过野人家亦或未至山复还然要必须出未尝辍也作字说时用意良苦置石莲百许枚几案上咀嚼以运其思遇尽未及益即嚙其指至流血不觉世传公初生家人见有□入其产室有顷公生故小字□郎尝以问蔡元度曰有之物理殆不可晓苏子

瞻性亦然初谪黄州布衣芒屨出入阡陌多挟弹击江水与客为娱乐每数日必一泛舟江上听其所往乘兴或入旁郡界经宿不返为守者极病之晚贬岭外无一日不游山晁以道尝为余言顷为宿州教授会公出守钱塘夜过之入其书室见壁间多张古名画爱其鍾隐雪雁欲为题字而挂适高不能及因重二卓以上忽失脚坠地大笑二人皆天下伟人盖出于智者当尔吾素顽惰固非二公之比自得此山乐其泉石欲为藏书之所且携数仆夫荷插持畚平夷涧谷搜剔岩窦虽风雨不避旁观皆以为甚劳而余实未尝倦殆其役于物耶

鹤林玉露赵季仁谓余曰某平生有三愿一愿识尽世间好人二愿读尽世间好书三愿看尽世间好山水余曰尽则安能但身到处莫放过耳季仁因言朱文公每经行处闻有佳山水虽迂途数十里必往游焉携樽榼一古银杯大几容半升时引一杯登览竟日未尝厌倦又尝欲以木作华岳图刻山水凹凸之势合木八片为之以雌雄笋相入可以折度一人之力足以负之每出则以自随后竟未能成余因言夫子亦嗜山水如知者乐水仁者乐山固自可见如子在川上与夫登东山而小鲁登泰山而小天下尤可见大抵登山临水足以触发道机开豁心志为益不少季仁曰观山水亦如读书随其见趣之高下

辍耕录林昉田间书载会友人游山檄云人有残缣败素绘一山一水爱之若宝售之必千金至于目与真景会则略不加喜毋乃贵伪而贱真邪求乐之真今日正在我辈春雪既霁春风亦和或坐钓于鸥边或行歌于犊外百年瞬息欢乐几何肴核杯盘随意所命毋以丰约拘也檄书驰告盍勇而前此文殊清新向予避兵云间泗滨时其地有林泉之胜而无烽燧之虞同时嘉遁者皆文人高士因仿司马温公故事俾予作约语云百岁光阴万物乃天地逆旅四时行乐我辈亦风月主人幸居同泗水之滨况地接九山之胜尽可傍花随柳庶几游目骋怀节序骎骎莫

负芒□竹杖杯盘草草何惭野蔌山肴虽云一饷之清欢亦是百年之嘉话敢烦同志互作遨头慨元佑之耆英衣冠远矣集永和之少长觞咏依然订约既勤践言勿替用附于此以见真率之会不让游山之乐也

笔记余出不能负向平五岳之笈入不能辟香山五亩之园惟买舟幙被于郡城内外名胜处避客息躬倪尚书经鉏堂所谓每月一游则日日可度每岁一游则可阅三十年也

采清课夫游道有三曰天曰神曰人天游则形神俱化神则意往形留人则抗志绝俗玩物采真而已若士汗漫于九垓轩辕隐几于华胥殆难拟议禽庆□断婚嫁幼舆置身丘壑庶几差近兼之者东方曼倩乎临世濯足希古振缨每读其传亟赏其言

山栖志方正学曰十五六时侍父北游济上历齐鲁之故墟览周公孔子庙宅求七十子之遗迹问陋巷舞雩所在慨然有愿学之志尝在郡城会集林张陈四君子登巾山绝顶纵谈千古竟夕不寐自以此乐乃苏子瞻死后三百年所无也

杨升庵曰清明时节楼船箫鼓行江南道中亦复奇胜

王廷陈寄余懋昭曰究心老庄保爱性命江湖乘兴涨则不舟雅好云峤苔滑磴危鲜不缓却此仆大略也

陈献章答李宪长曰平生山水稍癖待明年服阙后采药罗浮访医南岳上下黄龙洞啸歌祝融峰少偿夙愿

顾璘与陈鲁南曰今春长居墓田旧时草堂移入山中数舍四面竹松前通古道可步寻诸寺后有崇冈饭食一登南对牛峰石岭西望大江令人洒然可忘死

郑善夫答倪宗正曰自抵家削迹荒村与野老无别天下将太平吾辈耕岩钓海何适不乐秋末天台诸友欲往少谷遂为罗浮之行非漫说也

吴宽跋李宾之曰览宾之此录其间在南都时登临题咏凡崇台长榭古庙幽亭与乎仙宫佛庐之映带乎江山者皆予旧所经游而徘徊者也闭目了然殊深东坡龙井之叹

吴宽跋沈周画曰吴中多湖山之胜予数与沈君启南往游其间尤胜处辄有诗纪之然不若启南纪之于画之似也

见闻录徐文贞与郑文峰户部柬有意气有风度读之真如见古人也书云别后以初二日至姑苏次日与衡山南氓饮竹堂寺有僧颇能诗出示沈石田王守溪所题梅花卷展诵数四僧又摘花瀹茗作诸清供因留至暮得衡山赠行诗一首而归四日寓无锡枫潭及张黄门静思邀登惠山摄衣至绝岭南望太湖如衣带循山东下湖中诸峰隐隐天际如晨星昏□乍有乍无真异境也是夕宿五牧与荆川方山剧谈至夜半语多不经人道然要之不抵悟圣人五晨起校射一荒田中张侯百五十步往往破的观者如堵墙门人吴江阴峻伯取酒饮射所至午饭舟中遂趋毗陵六日饮道南书院张行吾出邸报知江贞斋以职方郎佐北雍喜得贤僚友为满饮三大爵七日同方山李节推慎庵董进士后峰访荆川于陈渡庄荆川特破格杀鹅炊黍留予辈饭李亦解射偕荆川发数十矢值暮乃罢八日以方山舟载荆川同趋丹阳门人镇江叶节推以明来迓九日谒陈少阳祠饮有归楼观少阳被逮时所作家书及高宗赠官□文相顾泣下罢酒是夕与荆川别十日至镇江十一日汤东督沂东邀予同方山登北固至第一峰眺览啸歌有超出六合之想忽大风吹予二人几堕岩下若造物阴有所忌者退饮佛殿观人皮鼓鼓盖沂东以所戮海寇王艮皮鞞之其声比他鼓稍不扬或谓人皮视牛革厚理或然也酒半沂东召二人搏一人长可五尺余其一人庞然大也顾不胜会报虜且入寇予以言激沂东沂东慨然曰嗟乎使仆得备戎行岂惜此血囊不为国家出死力哉予二人叹重久之

晡时邹别驾水东同以明邀登金山遍观其所谓海岳楼江天阁留云亭及壁间诸石刻赋诗一章有下窥三楚平揖两都之句薄暮风雨大作留宿寺中十二日午后始渡江而北盖旬日之间数百里之内观游之奇胜略备惜公不同之也